

四庫全書

集部

欽定四庫全書

集部

秋間集卷八十二

詳校官侍讀學士臣沈咸熙

侍讀臣孫球覆勘

總校官降調編修臣倉聖脉

校對官編修臣于鼎

謄錄監生臣徐用書

欽定四庫全書

秋澗集卷八十二

元 王惲 撰

中堂事記下

三。日癸巳京兆參知政事商挺

字夢卿子叔子

馳奏關陝重地

大亂後餘風有未殄者非廉希憲不能鎮撫中外右丞

相史公以聞允焉未刻復入見平章王文統請廉希憲

依已議同政不許遂以左丞相耶律鑄代廉赴燕

是日追謚

魏璠曰靖肅先  
生當改後從此

四月甲午有旨趣平章王文統南行於是定省府掾屬

去留者是日燕京路宣撫賽典只兒

回紇之有良德者  
自云世家同中國

孔子宗系累朝為斷事官輕財安民  
甚有人望後以平章政事終於雲南

真定宣撫劉肅授

吏戶禮三部尚書以上都太倉使宋紹祖邢人郝子明

為郎中益都等路宣撫宋子貞授兵刑工三部尚書以

太醫院官焦仲益李子敬為右三部侍郎

劉前進士自  
職官勾補省

掾北渡後佐東平幕上聞其有經濟才  
名治邢州省部之建詔其議論為多

五月乙未左右兩部官望謝恩命於省中都堂為諸投  
下招收人戶取索錢債奏奉聖旨諭十道宣撫司今體  
知得諸投下差使臣告奉到聖旨及令旨文字不經由  
本路官司徑直於州縣開讀拘刷民戶人匠便行拘收  
起移及取索錢債搔擾為此特降聖旨今後遇有各投  
下拘刷起移民匠取索錢債先須經由本路宣撫司行  
下達嚕噶齊官民官不係大數民匠合拘刷起移者依  
上拘刷並不得似前徑直於州縣一同搔擾如委實不

係大數合拘刷起移底民匠各路官司却不得遮當外  
據錢債公事不得一同拘收人員取索若委係已身借  
過錢債照依先降聖旨於宣撫司定奪立限歸還違者  
並行治罪已刻雷雨大作其驟烈可怖

六月丙申入奏行臺一切事理其旨有云管民官管軍  
官鷹房打捕諸色造作一切大小公事並聽行省從宜  
處置申刻宋劉二尚書來謝王相曰公等皆朝廷遴選  
謝于私門未敢聞命辭不見

七日丁酉奏准八座職印以白金作三臺鑄造其方寸  
皆從品秩有差午刻藏春上人以王相南下令僧逸以  
良馬二疋來錢陞戶部員外郎王煥為左三部郎中是  
日加尚書賽典只司農卿領左部如故從再請也

八日戊戌益都申宋人侵軼漣水與戰敗之是日追諡  
前經義狀元李俊民為莊靜先生云云先生字用章荷  
澤人明昌間進士道號鶴鳴老人在河南時於隱士荆  
先生傳皇極數學已未間聖上在潛令張仲一就問禎

祥優禮有加至是先生已歿其言盡徵故有是命以旌其德學云初張辭去田繼請以蒲輪來起公先生笑不答贈詩以見方來其辭曰丹鳳銜書下九霄山城和氣動民謠久潛龍虎聲相應未戮鯨鯢氣尚驕萬里江山歸一統百年人事見清朝天教老眼觀新化白髮那堪不肯饒明年正月先生卒於家愚觀其遺書所得益康節之傳云嘗與劉尚書才卿講究焚黃故事劉曰間嘗聞之高士美云其勅之全式尚書省牒故某官某職某



人牒奉勅可追諡某名牒至准勅故牒年月日後備具  
相卿圓押其勅封上題給付某人第其子孫錄全文如  
式火於本官家廟以告謂之焚黃

九日未刻右丞相布哈來約王相行期平章以行臺未  
辦事同丞相赴省議決申刻右相布哈入朝見馬陳邃  
授濱棣勸農使陳君錫大名宰懷州劉淵西京

十日庚子諸相座省劉尚書議部官署押事王相為裁  
定焉辰刻得宋荆湖制使與右相史公書并公文所贈

遺禮物時宋景定二年也具其事以聞是日高麗世子植來朝詔館于都東郊官舍從行者一十八人選筆且齊太原張大本字仲端美丰儀辯而有文采為館伴焉繼命翰林承旨王鶚郎中焦飛卿犒慰有詔翼日都省官與高麗使人每就省中戲劇者

十一日辛丑都堂置酒宴世子植等於西署其押燕者右丞相史公左丞相忽魯不花王平章張右丞張左丞楊參政姚宣撫賈郎中高聖舉從西榻南頭至東北作

曲肘座掌記王惲通譯事李顯祖皆地座西嚮其高麗

世子與參政李藏用

字顯甫

尚書李翰林直學士南榻座

亦西嚮又有龍舒院書狀等官凡六人尚書以下三人

皆襪而登席相次地座酒數行語既不通其問答各以

書相示丞相史公首問曰汝國海中所臣者凡幾處軍

旅有無見征戍者掌兵者何人官號何名參政李藏用

對曰掌兵者金氏史曰豈復猶以莫利支為名乎曰此

名廢去已久其官亦皆帶樞府兵部之號史曰聞汝國

亦嘗與宋人通好然乎曰但商舶往來耳平章王曰汝國今歲亦收成否曰仰賴聖恩雨暘時若溥霑豐稔又曰聞汝國用宋人正朔然乎曰第商人私有賫至本方者實不為用耳參政楊公曰聞汝邦亦設科舉曰然曰今歲試題為何曰賦則某題論則西門豹為政其炎如火詩則天砥礪兆民也又曰除詩賦策論外科名極多如經學陰陽醫方武舉算學之類皆是也宣撫姚公曰傳聞汝邦有古文尚書及海外異書曰與中國書不殊又

曰聞聖上近賜餼牽想已饜飫曰悉亡之矣曰博塞亡  
之乎讀書亡之乎曰博塞亡之矣遂哄堂大笑左丞張  
公問曰汝國王世系說是世臣胄裔曰非也其來是唐  
順宗第十三子逃難而立於此以王家後易姓為王時  
李叅政手持玳瑁聚娵史相曰執政官當以端方表德  
今所用非方非圓或聚或散何居李不能答有頃即以  
葛藤語亂之實飾辭也其世子與李叅政衣白縠上社  
祀冠則漆紗圓頂巾履舄皆以絲為之帶則烏犀小革

也其李顯甫面滿月白皙鬚髮皓然年十八以詞賦狀元第時六十一歲通禪學善作詩蓋世子之岳翁也酉刻皆霑醉而去其導從儀物張蓋乘馬馬首復持一大紫蓋比常蓋四垂極長問之曰引蓋也名曰儀則明日諸相入見上聞燕語甚懽遂以手詔玉帶遣還制詞有云出水而陸去危就安宜寬漢法之拘續議楚宮之作蓋准元年先奏便民之請也至元七年朝廷遣平章趙壁郎中宋道

字弘道終太子賓客

徙王都於海西岸江華島一炬

為焦土矣

十二日壬戌辰刻耶律中書張左丞傳旨今後應奉朝  
旨如無御寶并印信文字不得輒行未刻王相陞辭皇  
后及皇太子於青宮太子慰獎甚厚有元老克壯謀猷  
之諭申刻復入朝遂陞辭焉遂出自南門郊餞者廉平  
章楊叅政賈郎中及留冬諸掾屬比至南平藏春令左  
右迎候於道者踵相接也上人待遇甚恭極賓主之禮  
十三日癸亥辰刻齋畢而去

十四日甲子藏春來自南菴午刻會食史相行館寥休  
以灑墨玉盃贈公及觀所作玉鏡命諸公賦詩西菴  
有幸自得辭塗抹手照人毋用太分明之句仲晦為忻  
然也

十五日乙丑欲移寓太儀使王儀之館舍史公不許令  
與參議納哈君同寢處者四十餘日時憚管陳言文字  
就命日左右楊相權供中舍之職

十六日丙寅詔封保定張柔為安肅公制辭曰大夫當



七十之後致仕則宜國家列五等之封攷勲而授張某  
功成百戰眷荷累朝方深補袞之思遽有懸車之請宜  
疏上爵用荅元勲可特封某公致仕事業一時宜使古  
今之獲寵子孫後世要知忠義之可為宜保永年以全  
耆德濟南張榮為濟南公其詞曰大夫謝事得進退之  
宜國家定封明始終之義某官功高舊德教備義方方  
深分閭之期遽有懸車之請宜疏上爵以示殊恩可特  
封某公致仕廣及子孫常保山河之世名垂竹帛永為

忠義之門頤養遐齡保全耆德

十八日戊辰權中省都事趙謙得腦瘍極熾惛與楊都司誠之求療於太醫王儀之遂以真定麻澤民與視凡三往諾焉踵及門中使促而去之自是澤民內侍不得出者旬日趙之疾遂無及矣攜一僕既老而癡時臭惡聞戶外予絮兩鼻孔為湯藥之夜則對榻而卧伺其緩急義之所激曾弗之倦

十九日己巳堂議選中省兩司都事遂以左司授惛此

出史楊二公雅意辭曰據某何人過蒙擢用得文翰職足矣

廿五日甲戌都堂奉旨諭各路宣撫司宣聖廟國家歲時致祭如月朔釋奠宜恒令洒掃修潔今後禁約諸官員使臣軍馬毋得於廟宇內安下或聚集理問詞訟及褻瀆飲宴管工匠官不得於其中營造違者治罪管內凡有書院亦不得令諸人搔擾使臣安下

廿七日丙子都堂奉旨夫五岳之中恒屬其一豐阜峻

極作鎮北土爰古迄今祀典存焉粵自國朝開創以來  
祠祭之禮亦未嘗闕其岳廟中今後仰過往使臣軍馬  
毋得安下搔擾毀折樹木及不得於看廟人處奪要鋪  
頭口仍仰常切脩葺毋致疎荒

廿八日丁丑都堂奏奉聖旨道與真定路宣撫司據懷  
孟達嚕噶齊摩哩齊總管覃澄奏告管下地分多有屯  
住蒙古頭目遇有關涉詞訟公事不肯前來對證往往  
不伏勾追以致遲滯公事准奏仰遍諭諸路宣撫司今

後各州城管民官遇有關涉蒙古軍人公事理問時分  
管軍官一員一同聽斷施行毋得偏向准此

秋七月丙申辛酉朔前河東宣撫使張公以怨家有言  
去留維谷是日得行省諮保及史相庫左丞互為申理  
奏准充行中書省叅議方得解去良不易也嗚呼天道  
冥冥報施其間令人有可疑者今張以正獲罪然聖人  
所事不為過甚公豈犯此忌耶可不戒之哉其宣辭云  
張德輝宅心剛正處事精明及居風憲之司遂有澄清

之志巨猾望風而屏迹疲民受賜以到今不示顯庸何彰獨立可特授翰林學士參議行中書省事尚資婉畫庶底成功

十七日丁丑大司農左三部尚書賽典只改授平章政事制辭曰兩朝眷遇凡事精勤常辦集於軍前能經營於意外欲旌成績宜處台司當奉至公用遵大體盡爾贊襄之力副予委任之誠至於辦集經營當時論者謂於公甚為切當公遂置酒重以潤筆為答惓謝不敏

十八日戊寅翰林國史院保雷膺與惲克本院屬官

十九日己卯石抹剛紇答授右三部尚書制詞曰望高  
門第業不墜於箕裘身侍禁闥勞久服於歲月宜分膺  
於三部俾庸列於六卿可特授其官當副朕心毋瘵厥  
職

廿日庚辰行省諮者數事都堂議有可否史公曰雖分  
兩省其實一也若非關利害者不宜妄有阻駁使王事  
成就可也今後凡行省所諮須三日內咨報自是上下

云為如流水之源矣予當時嘆賞以為不多得也

廿一日辛巳詔世臣敏珠爾孩兒

圖刺太傅姓耶律氏在前金時戍桓州官

愛里德漢語守戍長也其後與一十八人從太極神元皇帝同飲於黑河子於佐命元酌公其一也敏珠爾太傅第二子早卒其子明安岱爾時年十有聖旨宣諭了三歲今衛輝路總管耶律漢傑即其兄也

也教省家與文書去者其制詞曰我家當開拓之初乃祖有經營之力人今不見功豈可忘雖爾身未及成人  
在朕心忍令無後姑承舊爵用顯元勲直須長立之年  
許領職司之務



廿二日庫庫學士授中書左丞庫庫字子清時年三十  
九歲嘗受學於王百一張耀卿其父潛邸舊臣世為阿  
塔齊漢語羣牧所官也

廿三日癸未鄭江授侍衛官其辭曰鄭江職在承宣誓  
從征役跡去易就難之意有忘家憂國之誠不示褒崇  
何明勸激就帶已降金牌充侍衛軍副都指揮使同判  
武衛軍事景州軍民長官如故更宜戮力以奏膚功是  
日有旨與老王姑護持玉華宮聖旨者其詞曰煉師王

道婦賦性純正執志不回挺然有古烈婦之風奉侍我  
太上皇皇太后積有年矣周旋之間曾無過舉當時雅  
為敬重使之入道為此先帝常加賜予已勅令真定管  
民官選擇佳地起蓋宮觀資給衣糧仍以玉華之名賜  
之以為我家祈福之地朝夕焚誦用報我皇考妣罔極  
之恩所在有司宜加持護毋容它人妄相侵奪毋以差  
役相毒以致不安常教告天與皇家子孫祝延福壽准  
此

廿五日乙酉權中省都事趙謙終於上都客舍惲為棺  
斂并封視隨行衣裝請于郎中賈君仲明蒙賻錢千五  
百緡

廿六日丙午遣送趙君焚於都城東十里外回適趙氏  
親知徐總管者至其僕與所封裝篋付焉

三十日庚戌時前軍儲所官察察爾台舒固納錫喇筆  
且齊馬烏呼納等爭相為用丞相史公與庫左丞議曰  
今南邊極遠江淮又不用兵所事宜廢至於異時征進

一行部官可辦既而中止特旨以前都運周惠子錯領其事

七月廿七日丁亥前大名路宣撫史幕官雷膺前東平路宣撫司同議權詳定官王惲同日授翰林修撰雷詞頭云家學有傳士行無玷昔年詩禮已聞鯉過於庭階今日絲綸復見鳳毛於池上可特授某官同知制誥兼國史院編修官宜振斯文以弼予治王詞頭云行已無忝博學能文顧超絕之逸材足鋪張於偉績宜司綸命

以贊皇猷可特授其官同知制誥兼國史院編修官當振斯文以宣朕命承旨笑謂膺等曰汝二人可謂佛子出世矣惲等謝不敏既而奏准行翰林院事三省既以院印授承旨公因與惲議曰前朝士人無幾若此老使得需一命儘有光矣遂保奏廿餘人擬為隨路提舉學校官是日有詔照會立翰林國史院道與翰林承旨王鶚據保奏翰林官修國史事准奏收拾者在這裡底先與職名者外未到人員候來時定奪今開坐原保人數

金史卷八十二  
并已除翰林院官職名如後

一已除

翰林學士承旨兼修國史王鶚

翰林侍讀學士郝經差克國信史

翰林侍講學士李昶兼同議東平路軍民事

翰林學士知制誥同修國史李治

翰林修撰同知制誥兼充國史院編修官雷膺

王惲

一未除見收拾

王盤直學士 徒單公履待制 孟攀麟待制

宋思誠修撰 胡祇通應奉

右仰照會收拾者准此

承旨王公字百一曹州東明人知人榜詞賦狀元皇帝  
在潛時首以禮幣徵焉以老儒故上甚敬重每見以狀  
元呼之以元年七月受是職公上章言修史事云自古  
國亡而史不亡唐取隋史焉宋取五代亦然金不為遼

作史至今天下有遺恨我國家以神武定四方皆太祖  
聖武皇帝廟謨雄斷所致若不乘時紀錄以詔萬世切  
恐歲久漸至遺亡又舉前朝名筆數人於是上特降是  
詔焉

廿八日戊子丞相史公遣修撰雷膺送安肅濟南二國  
公誥命公曰若所有潤禮汝二新人中受之且代光院  
之贈

廿九日巳丑申刻丞相史公臥閣中前刑部馬烏呼納



來謁辭不見曰若公務當於都省相見

秋八月丁酉辛卯朔徵君許衡授懷孟路教官制曰許衡天姿雅厚經學精專大凡講論之間深得聖賢之奧受罰者恐陳君所短為盜者畏王烈之知所在向風真堪正俗可令于懷孟等處選揀子弟俊秀者舉歸教育取作範模再令董子帷前有傳授之子弟重使王通門下皆經濟之名臣毋喪斯文以弼予治實傑授太子少傅制曰德全天懿學得聖傳文章足以徽帝猷言行足

以為世範屬周世本支之盛要漢家羽翼之成宜導春  
宮用嚴師訓可特授太子少傅早為諭教當自誠心左  
右前後皆正人宜公所選干戈羽籥在東序行見其儀

以上二篇皆楊  
公西菴筆也

宣撫姚樞授太子少傅制詞曰姚樞天

彝素厚聖學有傳能全踐履之功發自誠明之性養成  
者德無非禮樂詩書當侍春宮爰置左右前後可特授  
某官要明早諭以贊元良用傳震索之祥得繼離明之

照

二月壬辰奉旨諸路學校久廢無以作成人材今擬選博學洽聞之士以教導之凡諸生進修者仍選高業儒生教授嚴加訓誨務要成材以備他日選擢之用仍仰各路官司常加主領敦勸隨頒降從六品印信勾當

癸巳總帥汪某授鞏昌路便宜都帥其制曰某官勲高再世勇冠諸軍向因犯順之徒遽起稱兵之釁賴茲戮力殲厥渠魁及當來觀之時殊之自矜之色觀其誠亦深可尚嘉就帶已降虎符可授鞏昌路同簽便宜都總

金史卷八十二  
帥事宜盡贊毗以裨遺逸垂功名於千載萃忠義於一門尚副朕懷以固吾圉

甲午奏遣宣使王好禮閱鄧州軍實仍送萬戶史權改授江淮大都宣命及獎諭軍將等詔其辭曰朕即位之初深以戢兵為念故前年遣使於宋以通和好宋人不務遠圖伺我小隙反起邊釁東剽西掠曾無寧日朕自還宮諸大臣皆以舉兵南伐為請朕重憫兩國生靈之故猶待信使還歸庶有悛心以成和議留而不至今已

一載往來之禮遽絕侵擾之暴不已彼嘗以衣冠禮樂  
自居理當如是乎曲直之分灼然可見今遣使往諭卿  
等當整爾士卒礪爾戈矛矯爾弓矢約會諸軍秋高馬  
肥水陸分道而進以為問罪之舉尚賴祖宗社稷之靈  
其克有勲卿自當宣朕命明諭將士各當自勉予其大  
賚汝仰下項把軍頭目毋替朕命

四日乙未前奉使賀某復授宣諭大理國使其詞曰賀  
某幼懷奇節筮仕昌時及知遇於先朝遂撫綏於大理

揚威絕域昔收定遠之功服事彤庭屢抗伏波之請宜  
旌前效俾煥綸章汝其宣暢皇猷洋溢方外爰體綏懷  
之意以安遐邇之情轉為招徠式副所託

五日己亥承旨命惲與某同撰釋奠諸文某人所撰中  
涉論議公曰文自有體此等文字皆是贊頌功德不當  
如是徐莞爾曰不知謂我云何至於散文亦有三說入  
作須若虎首取其猛而重也中如豕腹取其釀而多也  
末同蠆尾取其臨出螫而毒也此雖常談亦可為之法

也

六日丙申詔追諡真定五路萬戶府叅謀李大

蔡州破將被戮

萬戶史侯救免之撫治真定有法

其詞曰政書仕籍聲振諫垣至於今

代以有為方之古人而無愧適將擢用遽爾愁遺既乖  
顯異於生前忍使湮沒於身後宜錫如綸之命用增拱  
木之光可諡曰貞肅魂其有知歆此無斁又同日復追  
諡前監察御史中庸先生張特立其辭曰學有淵源行  
無玷缺雖經喪亂不改故常向潛邸之升聞降璽書而

褒重未遂丘園之貴俄興寃宐之悲宜煥絲綸用光泉  
壤可依前號中庸英靈如在寵數其知又復追諡故徵  
君魏璫恬退自如剛毅有守常謂生前之不達忍令死  
後之無聞宜定嘉名以光後裔可諡曰靖肅

先生名璫字邦彥金貞祐初詞賦進士第道號一峯  
老人正大末以修撰使武仙不屈大元庚戌上徵至  
潛邸條陳三十餘事如定官號頒俸祿功罪有賞罰  
能否有升降署治天下之急務又曰農桑天下之大



本不可不重是故明君重五穀而賤金玉告訐之俗  
興罰及無辜僥倖之門啟官及不善漢之常平宋之  
講筵萬世可常行也又薦中州名士大夫六七十人  
今之施為多出先生餘論也今曾孫必復已為翰林  
修撰

七日丁酉許教官衡改授國子祭酒其辭曰懿德素全  
經學洞貫視聽言動皆合禮宜進退周旋舉皆中道所  
在滿禦寇之屢疇非趨董子之帷宜處成均以全樂育

可特授某官務講明於聖道為矜式於國人

八月戊戌太傅姚樞改授大司農其詞曰學明經旨德備天彝由本邸而知名從王師而伐罪黽勉從事於今有年可改授某職務要克謹農時一遵詔旨民舉緣於南畝歲有望於西成庸厚民生以強國本

九日己亥鄭汝翼授大理寺丞其詞曰某官法律深明臺寺徧歷常謹少恩之戒共推斷獄之平任此舊人弼予新政可特授某官宜在簿書之際更詳朱墨之工

十日庚子賜高麗國王僉手詔時值權臣金氏之變其  
辭曰世居東土封自西周中國之姓雖更外邦之貴不  
闕向以權臣之專寵至於隻矢以相加卿慨發純誠來  
修覲禮敬形于色濟濟然殊可觀情見乎辭謙謙而不  
自伐宜還舊服往紹新休可封高麗國王仍統治東方  
諸國如故尚服寵光益加奮勵

十一日辛丑徵君李治

字仁卿樂城人前進士初公徵至詢以時事但以真定木場抽

分官錢修蓋文廟而已道號敬齋

授翰林學士制詞曰某官秀擢巍科

力窮聖學據縱橫之文筆足潤色於皇猷况當青史之編宜與玉堂之選可特授某官知制誥庶得腹心之助以光綸綍之司

十二日壬寅劉東恕授中書吏部侍郎其詞曰家學有傳天資素厚向處副車之地已全製錦之功榮示褒崇以明獎勸可特降金牌授某職兼邢州安撫使往膺朕命毋廢攸司儻中心不異於此時豈後寵反薄於今日十三日癸卯太醫王儀之授太醫院判兼教授其詞曰

歷學精高儒術通貫肱不待於三折術已底於丕全久  
侍禁闥共惟耆德可授某官勾當尚傳素業用授諸生  
儀之林慮人沉静有議論  
每有所陳裨益時政甚多

十四日甲辰賜劉元帥手詔兼宣諭夔府路新附軍民  
人等其詞曰且土地定其疆固有朔南之異而父母愛  
其子曾何彼此之分朕嘗以四海為家萬方在已凡有  
來賓之俗敢忘同視之仁近因宋國之未臣遂致蜀川  
之重擾彼軍旅焉老淹於屯戍彼民人焉力盡於轉輸

況值凶荒舉皆轉徙保聚山麓者延生於歲月潛匿澤  
藪者橫死於風霜彼君有昧於天時在朕心亦有其慙  
德今茲劉整慕我國朝既能順德而來當副徯蘇之望  
市肆勿易田里俾安爾有貨財毋令剗掠爾有禾稼罔  
使踐傷諸回回通事人等逃在彼軍者許令自還為良  
不屬舊主除已行下陝西行省常加存卹不使侵攘外  
今降金牌五銀牌十以旌有功者當續具姓名頒降宣  
命凡在軍民各寧處所故茲詔示想宜知悉

十五日乙巳董文炳授親衛軍都指揮使其詞曰某官性秉忠貞才堪任使積年事上不違咫尺之天今日定封當處爪牙之地可特降虎符授親衛軍都指揮使同簽武衛軍事尚嚴宿衛益効勤勞用副朕心以成爾績十六日丙午宣諭歸附段實曰向率我師往臨爾境重拒國人之請以從城下之盟款附而來忠勤益著庸示至優之渥以彰同視之仁尚修前效無負初心撫安已附之民招集未降之衆國典有常卿其勉之

十七日丁未宣諭青居山帥臣某官爰從變故明甯事  
機攜赤子以來歸保青居而不失要明實志屢立戰功  
儻不示於寵章何以旌其忠懇用錫虎符之命以彰鴻  
渥之殊餘如故尚盡乃心無瘵厥職儻忠心不異於始  
豈後賞反薄於前前通許屯田萬戶宋拊字文卿授某路  
勸農官其詞有天資忠懇儒學專精昔蘭省之荷橐久  
勤王事近柳營之積穀大備兵儲宜崇褒獎之恩以盡  
始終之義其弟宋彰字壽甫屯田府諮議其詞曰明切事



機用抒誠款能釋樂成之業以明懷德之心宜示褒崇

取為勸激可充鄧州屯田總管下詔議兼招撫未降軍

民勾當更當自勉期有成勲

終州總管

邢州張安撫耕

字耘

夫真定靈壽人年二十用資入仕以名臣子補俸職大元癸丑授邢州安撫使至是超拜以施治效為人長身白皙氣貌沉厚犯而不校改授吏部尚書其詞曰德備忠純材優經

濟及試臨民之職首馳報政之聲保安全於久廢之餘

集流亡於四散之後以茲明效宜示寵章可超受吏部

尚書兼前職仍易虎符以昭鴻渥往膺朕命恪守攸司

十八日戊申奉旨頒降中統權宜條理詔

參政楊公筆也

制曰

事非前定無以啓臣民視聽不惑之心政豈徒為必當  
舉帝王坦白可行之制我國家以戎旌而開建於禁網  
則闊疎雖嘗有所施行未免涉於簡略或得於此而失  
於彼或輕於昔而重於今以茲奸猾之徒得以上下其  
手朕惟欽恤期底寬平迺姑立於九章用頒行於十道  
比成國典量示權宜務要遵行毋輕變易據五刑之中  
流罪一條似未可用除犯死刑者依條處置外徒年杖

數今擬遞減一等決杖雖多不過一百七下著為定律

揭示多方

闕

嗚呼六計周官所以弊羣吏之治三章漢法所以慰百姓之心詳酌舊規著為新制惟上令昭垂如日月則下情易避如江河雖曰從輕期於不犯咨爾有衆體予至懷故茲詔示想宜知悉

十九日己酉辰刻同雷彥正游宣撫子明

平章政事

赴南平

山辭藏春上人時入壇不克見游於菴門外大呼曰師  
父顯等謹來拜辭時丞相史公第四子杞侍上人於此  
遂置酒相別比回朔風振野吹砂礫射人殆勁矢然寒  
已不可勝矣

廿日庚戌詣都堂辭諸相南歸

廿一日辛亥辰刻由都西門出是夜宿桓州

廿二日壬子抵舊桓州

廿三日癸丑前次半羣頭取直東南下崖嶺夜半宿山

南農家明日甲寅宿雲州張繼先家

廿五日乙卯自望雲泐龍門河南行入寒山峪遇大雨  
憇寒山逋舖午霽渡泥澗人馬縋而下挽而上登靖邊  
北嶺有虎突起澗東嘯而去人馬為辟易投宿碧落崖  
下崖峻絕方廣如畫屏熱泉流縈帶環山根一匝秋稼  
已熟黃雲滿川蓋朔方之武陵溪也

廿六日丙辰下十八骨了泥滑不能騎比至平地僕馬  
為痛矣行約兩舍抵田家止宿

廿七日丁巳宿北口小店明日踰灰嶺試桃花峪溫湯  
山間殊有奇觀石為盤渦如碧玉盆者非一壽藤灌木  
交蔭左右其水泉蓋潞河之上源也是晚宿新店又二  
日至燕粵自中元九月奉檄北上至是年辛酉九月凡  
十有三月實歷三百八十四日

秋澗集卷八十二

欽定四庫全書

秋澗集卷八十三

元 王惲 撰

烏臺筆補序

至元改元之五年秋七月憲臺肇建於以配肅天德用  
昭太微執法之象詔前平章政事塔沁公為御史大夫  
曰中丞曰殿中侍御史以塔齊茂巴爾博果密貳焉曰侍  
御史曰治書曰監察御史純用漢人一切事宜率循舊

典其裏行十有二人令各舉所知以充員數侍御史太原高公乃以相人梁貞前翰林修撰左司都事惲俾膺遴選方朝廷嚮治思有以重之其監察到臺特詔廷見以肅其氣優祿稍以厲其嚴朱衣衮板雖以七品就列秩望清峻天下事無非所當言者其出使四方佩金符分屬掾馳驛傳中外具瞻凜然聳繡衣直指之望至有恨其崇資不得與之同事者內則號下臺通論駁設六察畫坊廂縱游翫小大事月限以數於是騰章抗狀紛



番迭作霜逐簡花風聲動臺閣矣僕俚廁裏行頗收薄  
用此受更凡三十有二月尸素既久具藁紛然併以外  
臺所言一二凡得臺綱書記事狀時務等篇總一百五  
十餘章釐為五卷題之曰烏臺筆補客有覽而謂予者  
曰昔人諫草往往削而去之子今是舉不幾於自用昭  
晰以章時事之非乎予曰客何見之晚也裏行言責也  
人與言雖卑而微其見於此者皆本臺已行底至而不  
遺者也故書之策正欲表夫朝廷寬忌諱重臺諫顧惟

堯言曾不少棄見乎微則其至者可知已至於政貴有恒辭尚體要予雖不敏中或有一得焉是又不可因已陳而廢之也客唯唯而退於是乎書以為序

烏臺筆補牒呈

監察御史王惲今呈謹集錄到御史臺典故條例上自秦漢迄於宋金凡七十三事逐一開列於左有可行於今者伏乞鈞覽采擇須至呈者

一古今名號更易

御史大夫 奏

大司空 漢

大司憲 唐

御史府 漢

憲臺 後漢

蘭臺 魏晉  
宋齊

左右肅政臺 唐

左右御史臺 唐

一員數品從

唐制

御史大夫正三品 百官志一員  
六典二員

中丞二員 百官志正四品  
六典正五品

侍御史

百官志六員從六品  
六典四員正六品

殿中侍御史

從七品百官志  
九員六典六員

監察御史正六品

百官志十五  
員六典十員

錄事二員從九品

金制

御史大夫一員從二品

中丞一員從三品

侍御史二員從五品

治書侍御史二員從六品

殿中侍御史二員正七品

監察御史十二員正七品

典事二員從七品 檢法四員從八品

一三院人數

唐制

臺院

令史七十八人 書令史二十五人

亭長六人

掌固十二人

殿院

令史八人

書令史十八人

察院

計史三十四人

令史十人

掌固十二人

金制

獄丞一員

架閣庫管勾一員

令史一十人分掌名頭

上臺機密房掌察到應干公事

下臺機密房掌同上臺謂監察糾到公事申  
臺

吏戶禮兵刑工房斟酌繁簡分掌刷案

一三院例

一曰臺院其僚曰侍御史呼端公知雜事謂之

雜端非知雜者號散端

二曰殿院其僚曰殿中侍御史呼侍御新入者知右巡以次左巡號兩巡使

三曰察院其僚曰監察御史亦呼侍御每公堂會食雜端在南榻主簿在北榻皆絕笑言

一臺門例

舊日御史臺在宮闕西南其門北開取陰殺之義一置獄例

舊臺中無獄有須留問寄禁大理若尋常之獄推



訖斷於大理唐李乾祐為大夫請置獄於臺中  
雖按問為便而增鞠獄之弊至開元間御史大  
夫崔隱甫奏罷之須留問者仍寄禁大理

一班簿例

治平元年閏五月詔御史臺閣門十日一具細書  
班簿以進自今大書為冊月上之

一兩臺發使例

舊例兩臺歲發使八人春日風俗秋日廉察以四

十八條察州縣

一受事例

舊例隻日臺院受事雙日殿院受事

一職官始置

御史大夫秦官位上卿銀印青綬掌副貳丞相其

監察御史掌監郡

一彈奏進止例

舊例彈奏皇帝視事日御史奏之景龍後皆先進

狀聽進止許則奏之不許則止

一 伺詰寃獄例

凡為三司伺詰三司為御史大夫中書門下省大  
事奏裁小事專達

一 衣冠例

秦御史冠柱後惠文蓋用鐵為柱取其審固不撓

唐大夫中丞遇大事押奏冠法冠

謂豸冠也

衣朱衣

纁裳白紗中單以彈之小事常服而已

一大禮例

國有大禮則乘輅車為之前導

一審覆例

若有制使覆案囚徒則刑部參擇之

一三司理事例

則與給事中中書舍人更直於朝堂受表

一中丞與皇太子三公相遇例

元魏朝故事中丞出與皇太子分路三公皆遙駐

車去頓軛於地以待其過其或遲違則前驅以赤棒棒之

一六職例

一曰奏彈

二曰三司

三曰西推

四曰東推

東西朝堂

五曰贓贖

六曰理匭

一侍御史五曹例

漢皆用公府掾屬高第者為之

一曰令曹掌律令

二曰印曹掌刻印

三曰供曹掌齋祠之事

四曰尉曹掌廄馬之事

五曰乘曹掌護駕之事

一新除有罰例

舊例新除者未曉制度有罰至罰有逾萬錢者若  
議罰則詢於雜端

一侍御等裏行例

唐龍朔元年置侍御裏行殿中裏行監察裏行武

后文明後端以裏行名官長安二年復置內供奉官

一供奉例

舊例掌殿庭供奉之儀式每朝與侍御史隨仗入位在中丞下給事中中書舍人後

一持書故事

持書侍御史者本漢宣帝元鳳中因路溫舒上書宜尚德緩刑帝深采覽之季秋請讞時帝幸宣

室齋居而決事令傳史二人持書故曰持書侍御史

一四推莅太倉左藏出納例

舊例以殿中侍御史第一人同知東推莅太倉出納第二人同知西推莅左藏出納號四推御史

一大朝會例

凡冬至元正大朝會則具服升殿若皇帝郊祀巡省則服從旌門往來檢察視其文物之有虧闕



則糾之

一 街署例

凡彈劾之事御史言於大夫若遇大事則方幅奏  
彈小事則署名而已

一 監察不得供奉例

舊例監察正門無籍非因奏事不得入至殿廷開  
元間勅並令隨仗而入不得供奉

一 監察例

凡冬至祀圜丘夏至祀方澤孟春祈穀季夏祀明  
堂季冬祀神州五郊迎氣及享太廟則二人共  
監之朝日夕月及祭社稷孔宣父齊太公蜡百  
神則一人率其官屬閱其牲牢省其器服辨其  
輕重有不修不敬則劾之

一會議例

尚書省監司七品以上官會議先牒報臺亦一人  
往監若據狀有違及不委議意而署名者糾彈

凡有勅令一御史往監即監察受命而行亦監其過謬

一監齋例

凡京都忌齋日則與殿中侍御史分察寺觀七品以上清官皆顧行香不到則牒送法司

一監決囚徒例

凡決囚徒則與中書舍人金吾將監之

一在京監察例

分知左右巡各察其所巡之內有不法之事謂左  
降流移停匿不去及妖訛宿宵蒲博盜竊獄訟  
冤濫諸州綱典貿易隱盜賦斂不如法式諸此  
之類減舉按而奏之若不能糾察及故縱蔽匿  
者則量其輕重而坐所由御史

一監察御史雜例

分察百僚巡按郡縣糾視刑獄肅正朝儀朝廷有  
不肅欽者御史則糾而劾之每二人五日分知

東西朝堂

一邊功例

凡將帥戰伐大克殺獲數其俘馘審其功賞辨其真偽

一門直例

凡自監察御史以上每日一人於本司當門直以檢察臺中出入及令史領詞訟過大夫之事若緣詞訟事須推勘者大夫便委門直御史以推

之

一風聞例

舊日御史臺不受訴訟有通詞狀者即於臺門候  
御史御史徑往門外收采知可彈者畧其姓名  
皆云風聞訪知

一相遇例

凡御史以下遇長官於路去戴下馬長官斂轡止  
之

一 監圍例

舊例蒐狩則監圍察斷絕失禽者

一 監選例

舊例吏部將除定員數及擬到州縣付之監察於  
吏部別置監察一幕御史閱數臨視而已若甲  
間或有資歷先後品從高下及不應等事許授  
除官陳告御史即推究根因與之改正

一 進帖例

監察舊例所進帖子止是今呈子樣但內為腰封  
其囊上用黃紙作帖黃上書奏帖二字下書臣  
某謹封

一照刷例

舊例照刷所司先具事目到臺其文卷後粘連刷  
尾具公事本末赴臺照刷監察御史於正位坐  
閱朱銷簿臺令史一人在旁亦坐執掌具到事  
目其當該人員引卷通讀若係算數文卷更設



帳科司吏一名與臺令史一同刷磨其中但有  
違錯稽遲監察將文卷收訖申臺量情治罪餘  
無違錯者即令大程官於刷尾騎縫近下先用  
刷訖銅墨印然後蓋以監察御史朱印及於朱  
銷簿上結尾後亦用刷訖銅墨印

### 一督軍御史

晉職官志光武建武初征伐四方始權置督軍御  
史事竟罷東晉孝武太元六年復置隋煬帝時

置監軍御史

一符節御史

前漢百官表其治書符璽者印綬比二百石以上  
皆銅印黃綬漢官儀尚璽四人掾史趙堯為符  
璽御史尚璽者也晉職官志符節御史秦符璽  
令之職也漢因之位次御史中丞掌綬節銅虎  
符竹使符及泰始中武帝省併蘭臺置符節御  
史掌其事焉

一防禁御史

晉職官志按魏晉官品令又有防禁御史第七品  
蘭臺之職也

一漢六條

漢官儀云部刺史周行郡國省察治狀黜陟能否  
斷治冤獄以六條問事非條所問即不省

其一條曰

強宗豪右田宅踰制以強陵弱以衆暴寡

其二條曰

二千石不奉詔書遵承典制背公向私旁詔中  
利侵漁百姓聚斂為奸

其三條曰

二千石不卹疑獄風厲殺人怒則任刑喜則淫  
賞煩徭刻暴刺截黎元為百姓所病山崩石裂  
妖祥訛言

其四條曰

二千石選署不平苟阿所愛蔽賢寵頑

其五條曰

二千石子弟恃怙榮勢請託所監

其六條曰

二千石違公下比阿附豪強通行貨賂割損政

令

一巡案官選判官支使例

舊例十道巡案則選判官二人為之佐如本道務

繁得量差官人歷清幹者號為支使

一巡案出入例

漢監者每三歲一更常十一月奏事三月還監焉

唐巡案使率三月以後出都十一月終入奏事

宰相李嶠請率州置御史一人以週年為限

一巡案州縣例

諸監司每歲分上下半年巡案州縣具平反冤訟

案訪利害及薦舉循吏案劾奸賊以聞

一案察所部有犯

諸案察官知所部官有犯若事理重者躬親廉察

部民訴訟  
縣令同

餘事聽先委不干礙清強官體究有

無實跡結罪保明申所委官司於案章內明坐

所差官體究到事因並不得出榜召人首告即

犯賊私罪雖已離任被告論或因事彰露者聽

案治

一具發摘過賊吏例

諸案察官每歲終具發摘過贓吏姓名置籍申尚

書省

一巡案許見賓客例

諸監司巡案許接見賓客惟不親謁

一直指使

漢直指使持斧衣繡衣

直指者為指事而行無阿私也衣以繡衣尊寵之也

出討奸猾  
治大獄

一知班受百官及命婦入宮帖子例



舊例百官入朝知班一人於宮門受百官及命婦  
入宮帖子其上書某官某職某爵上用職印令  
執事人授知班蓋使知其百官是日有疾病有  
故者其所告狀謂之曹狀

一知班糾彈例

殿中侍御史下設知班十人如百官朝會知班四  
人於四方臨視如有失儀墮簡者知班向其人  
前問何姓氏然後具狀糾彈

一主簿例

隋大業三年始置隋二員唐省一員掌印綬事發  
辰勾檢稽失及管轄臺中雜務公解厨庫檢督  
令史奴婢配勲散官職事每食則執黃卷書其  
譴罰

至元三年十一月

一五使例

謂廊下使入閣監食使監香使掌國忌行香二使

臨時克通謂之五使

三京留守御史臺

元和十三年後但以侍御史殿中侍御史監察御史共主留務三院御史亦不常備焉宋朝西京於分司官內差一員權闕即差官權掌南京止令留守通判權掌後北京置臺專差官天禧四年以翰林學士承旨兵部侍郎知制誥晁迥為工部尚書集賢院學士判西京留守司御史臺他

官止云權而迺云判者以三品故也

理檢使

宋朝淳化三年置院在宣德門外西北廊鼓院之西令登聞鼓司進狀人有稱冤濫沉屈者即引送理檢院審問

登聞鼓院

宋朝鼓在宣德門南街之西廊院在外門西之北廊舊曰鼓司景德四年五月改今名凡文武臣

僚閤門無例通進文字者諸色人進狀並先經  
登聞鼓院除告軍機密事及論訴在京臣僚即  
依例實封如進入後審狀有異同虛妄及夾帶  
他事並科違制之罪所論事理重依格勅施行  
仍令進狀人別寫劄子節畧要切事件連粘於  
所進其餘所進文字並先拆開看詳定奪或有  
原本文字照證連牒合屬司分取索若事合施  
行及所進利濟有可觀採便通進若顯有違礙

不可施行即當日內告示本人知委不識文字者許陳白紙據所論事件判院官當面抄劄詣實口詞仍當日據收接到所進文狀都數逐件開坐行與不行因依具單狀聞奏若進狀并遇白紙人稱鼓院看詳不盡情理即許經登聞檢院進狀披訴仰檢院詳酌事理若鼓院所定不行為當即據不行為當緣由判押審狀與進狀人收執如鼓院所定不當即其不當事件并原

進狀繳連進呈其收接所進文狀亦於當日內具都數開坐行與不行因依單狀聞奏其被訴人即時判審狀給付即許於御史臺陳訴其登聞鼓院檢院委實行遣不當者方得接駕及繳所判審狀披訴當付所司勘鞫如披訴得實判鼓檢院官必行朝典如是虛妄本人科上書詐不實之罪未經鼓院進狀檢院不得收接未經檢院不得接駕進狀違者依法科罪判院官二

人舊以內臣勾當至道三年改用朝臣

監鼓內侍二人

令史一人

### 登聞檢院

唐置匭宋朝太平興國九年改匭為檢東延恩曰

崇仁南招諫曰思諫西申寃曰申明北通玄曰

招賢改匭院曰登聞檢院在宣德門東廊之北

景德四年五月改為登聞檢院是月勅如急速

文字畫時進入常程文字一例每五日一次於



檢院內通進天聖七年上因讀唐史見匭函達  
下民冤枉之事乃謂左右曰天下九州之大豈  
無冤枉之人若至京師檢院鼓院理雪者必是  
州縣官吏提典刑獄轉運使不能理雪若又不  
為申理則赤子無告矣乃置匭函仍專命御史  
中丞為理檢使應諸色人除奇巧法術邪妄干  
正道事不得上言及常程公事自依久來體式  
令逐處官司并鼓院收接外如有指陳軍國大

事朝政得失大段冤枉累經訴理未獲辨明或  
事干機密並許詣匭函投進內委是急速文字  
畫時進入其餘並每五日於檢內進納如無亦  
具單狀聞奏如檢院進狀人稱冤濫沉屈者畫  
時引送理檢使審問判院官一人舊止舍人兼  
掌淳化二年始命他官判之

都護府

都護一人

掌所統諸蕃慰撫征討斥候安輯蕃人及諸掌罰叙錄勲功總判府事

副都護二人

長史司馬各一人

錄事功曹戶曹倉曹兵曹法曹參軍各一人參軍事二人

其安北單于唯有司馬倉曹兵曹各一人餘並不置

射聲校尉

漢掌待詔射聲士工射者宴宴中聞聲射則中之

因以名也須待所命而射故曰待詔射聲

戊己校尉

漢元帝初元元年置甲乙丙丁庚辛壬癸皆有正

位唯戊己寄治耳此所置校尉亦無常居故取  
戊己為名一說戊己居中鎮覆四方漢所置校  
尉亦處城之中撫諸國也

散騎常侍

騎馬並乘輿車騎而散從無職事也

舊日監察所行

一差監察例本臺且以三人為率本臺備具本官  
脚色伴奏日進呈御筆點差假如首先一人是

臺家注意者御筆或點却次者第三者

一無故入御史臺杖六十撾鼓者先杖八十

一臺諫檢院鼓院臺既立餘皆合行鼓院在掖門

東檢院在掖門之西

一舊來監察照刷止是徹卷看讀但有稽遲即有杖罪如違錯等事更不消說監繫取招訖送法司斷定然後決罰據勾當限次如瘡未愈勾當瘡已愈不出又是罪及照閱朱銷簿

一金國省院臺為三省

一舊有六臺六院

一上下臺大夫中丞為上臺侍御史以下為下臺

一治書侍御史乃是臺奏事官為制一臺事也

一報午時省即起然後臺起六部視臺起然後部

起

一按察兼運使其意以為按察中間一切欺隱不

公事則不敢犯早晨先與書史判按察司事次

乃與同知副使判運司事

一舊日監察如某吏行止不修及贓濫者監察於  
本人門或帖子或粉壁書云某人行止如此身  
事便索廢却

一臺有三臺上臺下臺外臺

一舊日監察出使帶牌起驛馬


一監察有急事至撒合門納帖子無問早晚自官  
中傳入奉御傳於門娘門娘轉於承御承御聞

奏上如熟寢承御直夜者不敢聲言擊所懸之玉謂之襲聲既寤進讀某人奏到帖子如此等事若上即裁決令承御批送省部臺上用小方玉印印之所司得旨登時勾當趁明日朝奏對一舊日監察外路有體究公事差部官一員并部令史事得其實官人申臺吏人杖一百以下皆決之若有大段公事臺司覆察得實關所該部分差部官與監察一同致勘如所察不實監



察所得罪只是罰俸贖銅

一舊日三品以上官有罪監察體究得實申臺呈  
省聞奏若宣勅本官不問虛實即便承伏如中  
間實有冤枉令家屬告登聞檢院不理然後過  
鼓以聞



秋澗集卷八十三

欽定四庫全書

集部

秋澗集卷十四至  
六

詳校官侍讀學士臣沈德潛

侍讀臣孫球覆勘

總校官臣降調編修臣倉聖脉

校對官臣編修臣于鼎

謄錄監生臣徐用書

欽定四庫全書

秋澗集卷八十四

烏臺筆補

彈聊城縣官汚濫事狀

元 王惲 撰

今體察得博州聊城縣周縣尹至元六年冬與部內良人妻阿曹通奸其秦主簿亦於當年秋前往上口鎮倉部糧與部民馮貸郎女通奸俱各私下用錢折合休和

了當就問得本路司吏朱勉與所察相同今來竊詳縣尹主簿俱係牧民之官承流宣化肅正風俗者也今侵犯部民其污濫非為如此合行糾勘

論中都喪祭禮薄事狀

竊惟送終人子之大事今見中都風俗薄惡於喪祭之禮有急當糾正者如父母之喪例皆焚燒以為當然習既成風恬不知痛敗俗傷化無重於此契勘係契丹遺風其在漢民斷不可訓理合禁止以厚薄俗外據除該

無問貴賤多破錢物市一切紙作房室侍從車馬等儀  
物不惟生者虛費於死者實無所益亦乞一就禁止據  
此合行具呈

皇太子親政事狀

蓋聞武丁學於甘盤號殷高宗孝宣起於民間為漢令  
主昔唐太宗視朝以子治觀政世宗東巡以允恭監國  
斯二君者豈特為元嗣廣聰明達民事而已蓋將正神  
明之器分夙夜之憂繫臣鄰之心慰億兆之望撫軍監

國皆其事也而賈生亦云太子正而天下定矣恭惟燕  
王殿下春秋鼎盛教敬日隆今者守中令領樞府然首  
居重器未嘗視事且古之聖人宜莫如舜尚歷試諸艱  
用彰玄德以憚愚慮誠宜早正位號俾躬理庶務仰承  
黃屋之心俯署青宮之事如每歲春車駕巡幸上都燕  
王殿下居守陪京撫臨漢地握一府之樞控百辟之重  
俾睿智足臨日深治道又念方今聖天子以仁厚恭儉  
率先天下而繼體者於稼穡艱難之事又不可不知也

不然沿邊將士自較閱以來上下負責不蒙自新雖欲  
功過相當將何所明若秋高馬肥奉將天威撫巡江漢  
以之頒犒祿秩赦宥過悞豈特旗幟壁壘精彩一新亦  
將作士氣遏蠻荆懷遠方安新附復有奮忠竭力建非  
常之功於目前者矣其爭先快覩謳歌慶幸倍於尋常  
萬萬也又省記頃者太子哈斯台在先朝時已以位號  
之正判署教條親諭漢官茲非其事與能若是固磐石  
之基定天下之本計孰大於此者憚職分雖卑猥當言



責國之大事敢冒敷陳

彈博州總管楊庭訓不之任狀

今體察到前博州路總管楊庭訓本官爰自宣州次官陞克河間路總管同知再考授博州路總管於今年七月內祇受宣命虎符克延安府總管朝廷恩私待以不薄不期錄連保狀輒自獻投以延安為下路欲難其行以少中為稍降妄攀別例一意徼求有虧廉節兼照得之官程限已有定例其楊庭訓自祇受以來經今四月

有餘推延事故逗遛不行恐臣子之分不當如此事屬非違合行糾劾

第二狀

近為延安路總管楊庭訓不赴任事已經具呈未蒙定奪竊聞上臺照勘體察本官原文卷意者豈謂憲司已有先行故遲遲其意却緣憚體訪此事前後月餘纔方得實據本臺事理並不知會至於愚見偶與鈞意畧同行之似不相妨緣原狀止彈本官為路小官降故違

朝命八十餘日不行之官至於旬投保狀曾不知愧即  
係彈章中引據事意本非正情設若在先亦有此等事  
體未嘗糾彈倘今後更有似此事同而情理深重者憚  
等合無具行與否據此合行載呈

論河南行省屯田子粒不實分收與民事狀

會驗河南行中書省咨該去歲屯田子粒一百萬石內  
明該屯戶收分語句今體訪得止收到稻穀又馬料粟  
通計約四十餘萬石其收分與民數目至今不曾給付

使失業之民二萬三千餘戶往還千里却於往貫般易  
餽糧以供朝夕貧者至嚙食草木陳告無所以致往往  
逃竄至有舉屯全空者竊惟屯田大計當草創之際所  
宜務遠圖固根本開布恩信撫養新集遵固守之道植  
久駐之基不務出此將上項子粒公文明該除數實惠  
曾不及民使官食前言民有饑色張虛數以邀上知顧  
小利而斂衆怨既非國家之便又非計久成大功之遠  
畧也其昧上虐下是屬姦欺據此合行糾呈

論河南分作四路事狀

竊見河南係邊防重地耕戰之大本所在今國家用兵  
江漢開置屯田示其久駐非特取襄陽而已為今之計  
宜分治撫養以實河南根本為急照得河南地方寬濶  
東西二千南北一千餘里跨州連郡大小七十餘城軍  
民一十八萬戶雖不及往時實亡金一國也今止設總  
府一道使都轄於上府治又處北偏東南州郡半與南  
郡犬牙交入如唐鄧徐邳亳潁等州去京近者五六百

里少有緩急其簿書期會往返交錯首尾相應動輒月  
餘不惟辦集生受其實難以控制兼平時與多故事勢  
不同自攻守襄陽以來轉輸調度百色所須取辦有司  
急於星火今而亦同止轄三兩州者張官置吏一體勾  
當縱彼人才固難負荷此特官府之難易耳所可慮者  
迤南屯田大復壞散往往避役至有舉屯全空者其患  
在不隸州府衆人耽悞無有專任責者故也又值蝗旱  
連年軍民困苦譬猶羣羊數萬被擾不安雖居牧地且

乏水草又令一人看管放牧未見其安且便也以憚愚  
見合無將河南地面分作四路以歸德為一路而徐邳  
宿亳隸之以蔡州為一路而陳潁睢息隸之以節州為一  
路而申裕唐隸之以南京為一路而鈞許嵩汝鄭延隸  
之其選任官吏比之常調增加品秩庶勉勸事功人爭  
効用外據所該屯地面其府官令兼帶營田使職名  
於上提點勾當外三路所有屯田戶主常加存卹將彼  
此事情互相照料撫養其生業休息其困乏使一方軍

民及居者屯者兩不失所方為稱職然後限以歲年責其成效以憑考較別議陞降如此庶得軍民兩安政成化理事無曠慢邊防之重地既安耕戰之大本又立以攻以守投之所向無不如意若貪外虛內置已有而不卹圖必爭之要害是猶荒膏腴之土不為耕稼而求不可治之石田竊恐為鄰人之輕且笑也外據真定平陽兩路亦宜標撥州縣另立散府使直隸省部管領其於官民亦為兩便且免夫尾大不掉之虞得強幹弱枝之



金史卷八十四  
道矣據此合行具呈

論集賽台加散官事狀

竊惟自古殿庭之間內而近侍外而宿衛凡有職掌俱帶散階理無一槩白身領宮掖之事者今伏見朝廷一切侍從宿衛集賽台等官員多係功臣子孫及歷年深遠辛勤勞績人員據見掌職事就中固分輕重上下終是朝家未嘗普覃加帶勲散階號使寵異其身名倘議而行在國家大為恩惠於臣子益勵忠勤且古人有言

人主之尊譬如堂羣臣如陛階增則堂高是近臣榮顯則人主愈尊崇矣今後合無將內外一切近侍環衛等官據見掌職事依驗色目普加散官如龍虎驃騎金吾奉輔國昭安懷定明武將軍之官下至丞昭忠尉之號更定奪俸秩為一代新制所謂立制自近貴始昨聞集議官官服色是欲辨上下定民志也據散階事理誠宜先有定奪然後服色可議蓋服色因官品而定官品由服色而顯也伏乞御史臺照詳

論收訪野史事狀

竊惟古者修史雖野史傳聞不以人廢伏見國家自中  
統二年立國史院令學士安藏收訪其事數年以來所  
得無幾蓋上自青吉斯皇帝迄于先帝以神武削平萬  
國中間事功不可殫紀近又聞國史院於亡金寶錄內  
採擇肇造事蹟豈非慮有遺忘歟然當其間從征諸人  
所在尚有旁求備訪所獲必富不然此輩且老將何所  
聞合無榜示中外不以諸色等人曾扈從征進凡有記

憶事實許所在條件或口為陳說及轉相傳聞事無巨細可以投獻者官給賞有差如此庶望人効衆美國就成書使鴻休盛烈晦而復明備見一代之史顧不盛歎

論品官懸帶弓箭事狀

竊見國家往年禁斷弓箭事久弊生中間似有未盡者今體訪得軍戶幹脫弓手打捕回回等人皆得懸帶而外任三品至七品以下官員皆不許懸帶據上項官員重則控制數州小則肅清百里其間懸佩符命赴任在

官往返道路緩急有虞無寸刃隻矢以禦強暴是國家  
命官不若打捕等戶之有備也且此法之行止能禁絕  
良民近年所在失事多係挾持弓箭馬賊其擅助賊威  
奪去民救莫此為甚據外任三品以下官員今後合無  
照依品官合得舊例定奪似為長便據此合行具呈

彈甲局首領官張經影占工役事狀

今體察得中都甲局首領官張外郎至元四年五年影  
占合造甲匠劉仲禮私下取要工價鈔四十四兩五

錢却將本人合造甲數逐作抑令其餘人匠分造了當  
今就問得張外郎名經是實據此合行開坐糾呈

為驛程量事緩急給限事狀

竊惟隨路每歲差遣人員赴都如計稟公事押運差發  
課程一切等物者既還心欲速得到家不問鋪馬生受  
日行數站其馬匹不無走損倒死以憚愚見今後除軍  
情急速人員外其餘所差人員合無照依舊例量事緩  
急定立往回地程使各站出給關文於上分明書寫日

行站數依上走遞仍令按察司體究違者治罪施行如  
此似望鋪馬少有倒死站戶不致生受

為典雇身良人限滿折庸事狀

竊見在都貧難小民或因事故往往於有力之家典身  
為隸如長春一宮約三十餘人原約已滿無可償主致  
有父子夫婦出限數年身執賤役不能出離又有親生  
男女詭名典嫁其實貨賣此又大傷風化甚不可長其  
典雇身人如原限已滿無財可贖者今後合無照依舊

例令限外為始以日折庸准算原錢使之出離其或典數口內有身故者除其死者一分之價至於願求衣食者聽外據典價不實者乞嚴行禁止如此不致以久成俗而雇身者免轉良為賤混淆無別不然迷失門戶耽悞差役深為未便合行舉呈

為不宜先浚新城壕塹事狀

竊見隨路連年蝗旱百姓饑乏者衆今春首農務將作大興力役擬浚治新城壕塹不惟妨奪民時竊恐轉致



因敝合無伺候秋熟舉作似為未晚不然若從重論理  
合先築宮城正宸極之位使內外有限以壯皇居然後  
宮室可得而議據浚鑿壕塹工役似未宜先行

為春秋時預期告諭事狀

近知得河間路任丘縣南史村軍戶劉阿李為殘害海  
青事將本婦人處斷訖叅詳在先為鷹隼海青公事然  
省部欽奉聖旨通行隨路出榜省諭而農民愚戇月日  
深遠不無遺忘兼且海青飛舉動輒千里竊恐遠方之人

不知係是車駕飛放禽羽以憚愚見今後御前鷹隼海  
青合無懸帶記驗如前朝牙牌之制每遇春秋飛放之  
時更令所司預期將一切禁忌違犯之事重行嚴切省  
諭使農民臨時又得曉然通知如此豈惟易避難犯亦  
不致悞有損害似為便當令後設或復有違犯之人乞  
送有司照依扎撒斷罪施行

秋澗集卷八十四